

1**Pananampalataya sa mga Pangako ng Diyos para sa Susunod na Henerasyon**

Dahil sa pananampalataya, sinabi ni Jose nang malapit na siyang mamatay na aalis ang mga Israelita sa Egipto, at ipinagbilin niyang dalhin nila ang mga buto niya kapag umalis na sila. MGA HEBREO 11:22

(Basahin din ang **GENESIS 50:24-26**.)

Nang magbigay si Jose ng habilin sa mga Israelita tungkol sa kanyang mga buto, nabanggit niya ang lupain na ipinangako sa kanila ng Diyos. Ang lupain na ito ay ipinangako sa magkaka-ibang henerasyon at ipinangako ng iisang Diyos sa mga ninuno ng Israel na sina Abraham, Isaac, at Jacob (Genesis 50:24). Nanampalataya din si Jose na ito rin ang pangako ng Diyos sa mga susunod pang henerasyon, kahit pa hindi na niya makikita ang katuparan ng pangakong ito. Ang pangakong ito ay lalagpas sa hangganan ng kanyang buhay, at maipapasa sa mga henerasyong darating. Bilang patunay ng pananampalatayang ito, hiniling niya sa mga Israelita na isama nila ang kanyang mga buto kapag dumating na ang oras ng katuparan ng pangako ng Diyos. Ano ang mga bagay na hinahangad mo na lalagpas sa hangganan ng buhay mo?

2**Pananampalataya sa mga Pangako ng Diyos sa pamamagitan ng Susunod na Henerasyon**

Dahil sa pananampalataya, sinabi ni Jose nang malapit na siyang mamatay na aalis ang mga Israelita sa Egipto, at ipinagbilin niyang dalhin nila ang mga buto niya kapag umalis na sila. MGA HEBREO 11:22

Sa paghahabilin niya ng kanyang mga buto sa kanila, ipinakita ni Jose ang paniniwala niya na ipagpapatuloy ng mga susunod na henerasyon ng mga Israelita ang pananalig at paghahangad ng mga ipinangako ng Diyos sa kanila, gaya ng ginagawa niya, at gaya ng ginawa ng mga ninuno nila. Hindi ito nakasalalay sa kung makikita ba nila o hindi ang katuparan ng mga ipinangako, kundi sa katapatan ng Diyos na tuparin ang Kanyang mga pangako. Naniniwala ka ba na ipagpapatuloy ng susunod na henerasyon ang mga hangarin at pangakong ibinigay sa iyo ng Diyos?

APPLICATION

- Naniniwala ka ba na dapat kang manampalataya sa Diyos lamang? Tinanggap mo na ba si Jesus bilang iyong Panginoon at Tagapagligtas? Kung hindi pa, gusto mo bang ipanalangin ito ngayon?
- Ang pananampalataya mo ba sa mga pangako ng Diyos ay lalagpas sa hangganan ng buhay mo? Sa araw-araw mong paghahangad sa Diyos, isulat at ipanalangin ang mga pangako ng Diyos na gusto mong angkinin hindi lamang para sa iyong sarili kundi para rin sa susunod na henerasyon.
- Nagtitiwala ka ba na ipagpapatuloy ng susunod na heherasyon ang mga hangarin at pangako na ibinigay sa iyo ng Diyos? Ano ang ilan sa mga paraan na magagawa mo upang ipasa sa susunod na henerasyon ang mga hangarin at pangako sa iyo ng Diyos?